

## Bakat e-Sukan IPT dicungkil

Aida Adilah Mat  
Aida\_adilah@mediaprima.com.my



KOLEJ Poly-Tech MARA (kiri) menentang Universiti Teknikal Malaysia Melaka dalam permainan PES 2019 Kejoanan e-Sukan Kampus di Sunway Pyramid. – FOTO Khairul Azhar Ahmad

SEBANYAK 48 pasukan dari lima zon beraksi pada Grand Final XPAX Kejoanan e-Sukan Kampus (KEK) sulung dan terbesar di negara ini yang menyaksikan wakil institusi pengajian tinggi bersaing merebut gelaran juara bagi setiap kategori yang dipertandingkan.

Acara e-Sukan kampus terbesar di Malaysia itu dianjurkan Media Prima Digital menerusi portal permainannya, MyGameOn serta rakan strategik Kitamen menawarkan hadiah tunai terkumpul berjumlah RM180,000.

Dicetuskan oleh XPAX, pertandingan e-Sukan kali ini membabitkan persaingan tiga permainan popular Mobile Legends Bang Bang, Pro Evolution Soccer 2019 (PES 2019) dan DOTA 2.

Ketua Pegawai Eksekutif Media Prima Digital, Rafiq Razali berkata, beliau gembira dengan sambutan yang diterima dan ia di luar jangkaan.

“Kami mendapat maklum balas positif di semua lokasi zon final XPAX KEK.

“Semestinya, penganjuran acara e-Sukan kampus terbesar ini menjanjikan pengalaman berbeza apabila kami berjaya mengumpulkan bakat e-Sukan yang terdiri daripada pelajar institusi pengajian tinggi,” katanya.

Beliau bagaimanapun berkata, kejohanan itu tidak akan menjadi kenyataan tanpa komitmen yang diberikan penaja utama, XPAX dalam memperkasa industri e-Sukan negara.

“Terima kasih atas sokongan yang diberikan dan tidak dilupakan juga kerjasama daripada pengurusan kampus yang terbabit juga penting dalam membangunkan industri e-Sukan di Malaysia seterusnya membentuk ekosistem sihat yang boleh membudayakan konsep ‘healthy gaming’ dalam kalangan pelajar IPT di seluruh negara,” katanya.

Pada kejohanan itu, institusi pengajian tinggi dengan pasukan yang meraih kemenangan paling banyak akan menerima biasiswa bernilai RM50,000 dari Celcom, XPAX, sebagai salah satu inisiatif memperkasa e-Sukan.

**Disiarkan pada: April 26, 2019 @ 9:16pm**

**Sumber :** [Bakat e-Sukan IPT dicungkil \(hmetro.com.my\)](http://hmetro.com.my)